

Acordo do Consello de Goberno do 8 de outubro de 2015, polo que se aproba o Regulamento Electoral Xeral da Universidade de Santiago de Compostela

MODIFICACIONES

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario

Artigo 3 apartados b) e d) nova redacción por artigo único apartado un.

Artigo 8 apartados 1 e 4 nova redacción por artigo único apartado dous.

Artigo 21 apartado 1 b) nova redacción por artigo único apartado tres.

Artigo 46 apartados 1 e 2 nova redacción por artigo único apartado catro.

Artigo 52 apartados 2 e 4 nova redacción por artigo único apartado cinco.

Disposición adicional oitava engadida por artigo único apartado seis.

Aprobado polo Consello de Goberno do 8 de outubro de 2015 O Regulamento Electoral Xeral vixente procedía dun acordo de Consello de Goberno do 30 de marzo de 2004, razón pola cal non estaba adaptado aos Estatutos da Universidade publicados no Decreto 14/2014, do 30 xaneiro. A necesidade de afrontar diferentes procesos electorais carecendo dunha norma axeitada obrigou ao Consello de Goberno do 21 de febreiro de 2014 a adoptar certos acordos polos que se configuraba o marco normativo da elección de reitor; e, tamén, a Comisión Electoral Central, na súa sesión do 17 de setembro 2014, para permitir o correcto desenvolvemento do Claustro, e na súa sesión do 14 de xaneiro de 2015, para fornecer as eleccións de representantes de directores de departamento, de institutos de investigación e doutras estruturas de investigación universitarias, ao Consello de Goberno.

Ante esta situación o Claustro Universitario, no Pleno do 26 de xuño de 2015, procedeu a aprobación das Liñas Xerais do Regulamento Electoral Xeral, sobre as que descansa o presente texto.

Nesas Liñas, introducíronse importantes cambios no número, estrutura e ámbito dos procesos electorais da Universidade, sendo o caso do referido aos representantes nos comités de



dirección das escolas de doutoramento; melloráronse as garantías instrumentais, como a asunción pola Secretaría Xeral da actualización dos censos electorais correspondentes aos órganos colexiados de facultades, escolas, institutos de investigación, escolas de doutoramento, etc.; e incorporáronse as novas tecnoloxías no desenvolvemento de tales procesos, do que se dá razón no novo proceso electoral electrónico.

Este Regulamento non é máis que o texto articulado no que se recollen as Liñas Xerais aprobadas polo Claustro. Unha norma que pretende dar reposta ás necesidades derivadas dos Estatutos da Universidade no ámbito dos seus procesos electorais.

TÍTULO I. DISPOSICIÓNS XERAIS

CAPÍTULO PRIMEIRO. ÁMBITO DE APLICACIÓN

Artigo 1. Aplicación

1.- O presente Regulamento será de aplicación aos seguintes procesos electorais no ámbito da Universidade de Santiago de Compostela (USC):

- a) Elección de reitor.
- b) Elección de membros do Claustro Universitario, das xuntas de facultade e de escola, dos consellos de departamento e dos comités de dirección das escolas de doutoramento.
- c) Elección de decanos de facultade, directores de escola, directores de departamento e directores de escolas de doutoramento.
- d) Elección de representantes dos directores de departamento, institutos universitarios de investigación, escolas de doutoramento e doutras estruturas universitarias, no Consello de Goberno.

2.- A elección dos directores e dos membros dos consellos científicos e das xuntas de goberno dos institutos universitarios de investigación, farase de acordo co establecido nos Estatutos da Universidade, nos seus respectivos regulamentos de réxime interno, e neste Regulamento. Os restantes procesos electorais rexeranse polas súas normas específicas, tendo o presente regulamento o valor de dereito supletorio.

3.- O presente regulamento será de aplicación preferente a outras disposicións da Universidade que regulen a mesma materia; e as normas e principios xerais enunciados nel servirán de criterios interpretativos en todos os procesos electorais da Universidade de Santiago de Compostela.

CAPÍTULO SEGUNDO. DEREITO DE SUFRAXIO



Artigo 2. Principios xerais do sufraxio

1.- O sufraxio será universal, libre, directo e secreto, dentro do correspondente colexio electoral.

Ningún pode ser obrigado ou coaccionado baixo ningún pretexto no exercicio do seu dereito de sufraxio, nin a revelar o seu voto.

2.- Sen prexuízo das disposicións sobre o voto electrónico, anticipado e o voto dos membros das mesas electorais, o dereito de sufraxio exerceuse persoalmente no sector, subsector e circunscrición electoral na que o elector estea censado, ou no órgano colexiado ao que pertence.

3.- Ningún pode votar máis dunha vez en cada proceso electoral.

Artigo 3. Electores

Son electores, sempre que reúnan os requisitos legalmente establecidos para cada elección e figuren inscritos no correspondente censo electoral ou formen parte do órgano elector:

a) O profesorado doutor con vinculación permanente en situación de servizo activo, se é funcionario, ou equivalente, se fose persoal laboral, con destino na Universidade de Santiago de Compostela. Non será elector quen desempeñe praza ou posto fóra da Universidade en comisión de servizos ou situación similar.

b) Os membros das restantes categorías de persoal docente e investigador. En particular terá tal consideración:

- O profesorado funcionario non doutor.
- O profesorado axudante doutor.
- O profesorado colaborador.
- O profesorado colaborador.
- O profesorado asociado.
- O profesorado substituto.
- O profesorado emérito.
- O profesorado visitante.
- O profesorado distinguido.



- O persoal investigador da USC pertencente a algunha das categorías establecidas na Lei 14 /2011, de 1 de xuño, da Ciencia, a Tecnoloxía e a Innovación así como no Acordo sobre clasificación profesional e as condicións retributivas do persoal investigador e do persoal de apoio á investigación da Universidade de Santiago de Compostela, sempre que permitan a colaboración en tarefas docentes.

- O persoal investigador en formación, segundo o establecido nos Estatutos da USC e na Disposición adicional quinta deste regulamento.

- O persoal doutor contratado pola USC consonte a lexislación vixente con cargo a programas competitivos de incorporación ás universidades de investigadores e/ou docentes, sempre que o contrato permita impartir docencia.

- Aqueloutras persoas contratadas pola USC mediante concurso público que realicen labores docentes ou investigadoras e que cumpran os requisitos, entre outros os de permanencia e dedicación que se establezan neste Regulamento.

No caso de profesorado e persoal investigador con vinculación temporal coa USC, será requisito para considerarse elector a acreditación do vínculo coa Universidade que debe ter unha antigüidade igual ou superior a un ano dentro dos últimos dezaioito meses e unha dedicación polo menos a media xornada.

c) O alumnado matriculado en titulacións oficiais consonte o artigo 75.4 dos Estatutos da Universidade.

d) O persoal técnico, de xestión e de administración e servizos con cargo ao capítulo I das normas orzamentarias, o persoal directivo profesional e o persoal eventual, así como o persoal das categorías de persoal investigador sen colaboración en tarefas docentes e das de persoal de apoio á investigación recollidas no Acordo sobre clasificación profesional e as condicións retributivas do persoal investigador e do persoal de apoio á investigación da Universidade de Santiago de Compostela.

No caso de persoal técnico, de xestión e de administración e servizos e de persoal investigador sen colaboración en tarefas docentes e persoal de apoio á investigación con vinculación temporal será requisito para consideralo como elector que o seu vínculo coa Universidade teña unha antigüidade igual ou superior a un ano dentro dos últimos dezaioito meses e unha dedicación de polo menos media xornada.

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario.

Artigo modificado: Artigo 3 apartados b) e d) nova redacción por artigo único apartado un.

Artigo 4. Elixibles



1. - Son elixibles os que posuíndo a calidade de elector reúnan así mesmo as condicións requiridas nos Estatutos da Universidade e na lexislación vixente para seren elixidos.
2. - Os requisitos esixidos para exercer o dereito de sufraxio pasivo deberán reunirse na data da presentación da candidatura e manterse ata a celebración das eleccións.

Artigo 5. Colexios electorais

Os colexios electorais estarán integrados por:

- a) Nas eleccións de reitor, o conxunto de electores da comunidade universitaria.
- b) Nas eleccións de representantes no Claustro Universitario, o conxunto de electores da comunidade universitaria, segundo o disposto no artigo 75 dos Estatutos da Universidade.
- c) Nas eleccións a representantes nas xuntas de facultade ou escola, nos consellos de departamento, nas xuntas de goberno dos institutos de investigación, e nos comités de dirección das escolas de doutoramento, o conxunto de electores inscritos no censo do respectivo centro, departamento, instituto ou escola de doutoramento. As outras estruturas universitarias de investigación se regularán conforme aos seus propios regulamentos.
- d) Nas eleccións a decano de facultade ou director de escola, a respectiva xunta de centro.
- e) Nas eleccións a director de departamento, o consello de departamento.
- f) Nas eleccións a director de escola de doutoramento, o comité de dirección.

Artigo 6. Circunscricións electorais

1.- Serán circunscricións electorais nas eleccións de representantes no Claustro Universitario:

- a) Para o profesorado doutor con vinculación permanente (sector I), as facultades ou escolas.
- b) Para os membros das restantes categorías de persoal docente e investigador (sector II), as cinco grandes áreas de coñecemento.
- c) Para os estudantes matriculados en titulacións oficiais (sector III), as facultades ou escolas.
- d) Para os estudantes de doutoramento, as escolas de doutoramento.
- e) Para o persoal de administración e servizos, os campus de Lugo e Santiago de Compostela.

2.- Serán circunscricións electorais nas eleccións a representantes nas xuntas de facultade ou de escola, os propios centros.

3.-Serán circunscricións electorais nas eleccións a representantes nos consellos de departamento, os propios departamentos.



4.- Serán circunscripcións electorais nas eleccións a representantes nos consellos científicos e de dirección dos institutos universitarios e nas eleccións a membros dos comités de dirección das escolas de doutoramento, os propios institutos ou escolas.

5.- As circunscripcións electorais deberán contar cun número mínimo de dez electores. Cando o número de electores nun determinado sector, subsector e circunscripción sexa inferior, a Comisión electoral agrupará a dita circunscripción con outra ou outras co fin de garantir o secreto de voto.

Neste suposto, a Comisión decidirá oídas as xuntas dos centros afectados ou o órgano na que estas deleguen, que deberán proporcionalo no prazo indicado pola Comisión, e noutro caso presumirase favorable a decisión da mesma.

CAPÍTULO TERCEIRO. ADMINISTRACIÓN ELECTORAL

Artigo 7. Administración electoral

1.- A administración electoral ten por finalidade garantir, nos termos do presente regulamento, a transparencia e obxectividade dos procesos electorais e o principio de igualdade.

2.- A administración electoral corresponderá á Comisión Electoral Central da Universidade e, no caso das eleccións reguladas no Título I, tamén ás mesas electorais. Os órganos de goberno da universidade colaborarán así mesmo coa administración electoral na organización e xestión dos procesos electorais nos asuntos que lles sexan encomendados.

3.- A resolución das reclamacións, impugnacións ou calquera outra cuestión que se suscite nos procesos electorais corresponde á Comisión Electoral Central da Universidade. Os seus actos esgotan a vía administrativa.

Artigo 8. Comisión Electoral Central

1.- A Comisión Electoral Central da Universidade terá como ámbito de actuación todos os procesos electorais sometidos ao presente regulamento. Estará composta pola secretaria ou secretario xeral, quen a presidirá, e por doce membros máis distribuídos como se detalla:

- a) Seis do profesorado doutor con vinculación permanente (sector I), procurando que polo menos tres teñan coñecementos xurídicos.
- b) Tres das restantes categorías de persoal docente e investigador (sector II).
- c) Dous do estudantado matriculado en titulacións oficiais (sector III).
- d) Un do persoal técnico, de xestión e de administración e servizos.

2.- Os membros da Comisión Electoral Central, agás o presidente, serán elixidos por e entre os membros do Claustro Universitario na primeira sesión en que sexa posible tras a súa renovación, por votación de cada sector.

3.- Os membros elixidos desempeñarán as súas funcións ata a elección dunha nova comisión polo Claustro. Non obstante, logo da renovación do estudantado prevista no artigo 76.1 dos Estatutos da Universidade, o Claustro cubrirá as vacantes que houbese e renovará os membros indicados na letra c) do apartado anterior. En todo caso, se as vacantes superan un terzo dos membros da Comisión, deberán elixirse canto antes os substitutos, que desempeñarán as súas funcións polo tempo que reste ata a correspondente elección.

4.- Actuará como secretaria da Comisión Electoral Central, con voz pero sen voto, a persoa funcionaria da USC que se designe.

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario.

Artigo modificado: Artigo 8 apartados 1 e 4 nova redacción por artigo único apartado dous.

Artigo 9. Competencias da Comisión Electoral Central

1.- Correspóndelle á Comisión Electoral Central:

a) A resolución, en única instancia, dos recursos que interpoñan os titulares do dereito de sufraxio contra a súa inclusión ou omisión indebida no censo pola Secretaría Xeral.

b) A distribución en cada procedemento electoral, cando proceda, do número de representantes elixibles en cada circunscrición, sector e subsector, así como a resolución dos recursos que se interpoñan contra a dita distribución.

c) A aprobación do modelo oficial a que se axustarán o escrito de presentación de candidaturas, as papeletas, as credenciais dos interventores, o xustificante de emisión do voto, a certificación censual específica, o recibo acreditativo da recepción do expediente electoral, así como os modelos das actas de constitución de mesas electorais, de escrutinio, de sesión, de escrutinio xeral e de proclamación de electos, e calquera outros modelos tanto impresos como electrónicos.

d) A cualificación e a proclamación de candidatos e a resolución dos recursos que estes interpoñan contra a mencionada proclamación.

e) O sorteo para establecer a orde de colocación dos candidatos nas papeletas oficiais de votación.



- f) A organización do procedemento de emisión do voto e a determinación do número de mesas electorais, así como a situación das mesmas.
- g) O sorteo dos membros titulares e suplentes das mesas electorais.
- h) O exame e resolución das causas xustificadas que impidan formar parte das mesas electorais.
- i) A dirección e coordinación das mesas electorais.
- j) A expedición aos presidentes das mesas electorais do correspondente recibo acreditativo da recepción do expediente electoral, se así se solicita..
- k) A elaboración dun manual de instrucións sobre as funcións dos membros das mesas electorais.
- l) A provisión e distribución de urnas, papeletas e sobres, en colaboración cos órganos de goberno correspondentes.
- m) O escrutinio xeral, verificando o recuento dos votos admitidos nas diversas mesas electorais.
- n) A proclamación dos candidatos electos e a extensión da correspondente acta por duplicado.
- o) A remisión ao reitor das cuestións disciplinarias que se produzan en relación a actos electorais.
- p) A revogación de oficio en calquera tempo, ou a instancia de parte interesada dentro do prazo de cinco días, das decisións dos órganos de goberno de facultades, escolas, departamentos e institutos que os afectados polas ditas decisións recorran ante a Comisión Electoral Central por oporse aquelas á interpretación da normativa electoral realizada por esta.
- q) A resolución con carácter vinculante das consultas en materia electoral que lle formulen a secretaría xeral ou os demais órganos universitarios.
- r) A elaboración de instrucións de obrigado cumprimento para a administración electoral en calquera materia electoral; e a formulación dos criterios interpretativos en aplicación da normativa electoral.

2.- Sen prexuízo das competencias da Comisión Electoral Central citadas, no caso de votación electrónica deberá tamén:

- a) Nomear, tras o correspondente sorteo, os membros titulares e suplentes das mesas electorais.



b) Nomear aos delegados da Mesa Electoral Electrónica nas sedes establecidas para a emisión do voto electrónico no caso de terse elixido este sistema de votación.

c) Decidir o sistema de votación, manual ou electrónica, para cada proceso electoral e o sistema de acreditación da identidade dixital no caso de votacións electrónicas.

Artigo 10. Funcionamento da Comisión Electoral Central

1.- As sesións da Comisión Electoral Central serán convocadas polo seu presidente. Admitirase a convocatoria por correo electrónico se así o acorda a Comisión.

2.- Para que a reunión se celebre validamente deberán concorrer en primeira convocatoria a metade dos seus membros, debendo figurar entre eles o presidente e o secretario, ou quen os substitúan. No caso de non reunirse o quórum suficiente, a reunión entenderase convocada de novo aos quince minutos da primeira, e nesta segunda convocatoria bastará a presenza dun terzo dos seus membros, sempre que asistan o presidente e o secretario, ou quen os substitúan.

3.-Os acordos adoptaranse por maioría. O voto do presidente será de calidade en caso de empate.

4.- A Comisión poderá autorizar ao presidente ou ao secretario para a resolución dos asuntos que expresamente determine. Así mesmo a Comisión poderá adoptar acordos sen necesidade de reunirse, en asuntos sobre os que manteña unanimidade de criterio, logo de que o presidente confirme o dito criterio común por medio de comunicación telefónica ou electrónica.

5.- Sen prexuízo do disposto nos apartados anteriores, o presidente poderá responder por si ou a través do secretario da comisión ás consultas que se lle fagan sobre asuntos de competencia da mesma, sen que esta quede vinculada pola dita resposta agás no caso de autorización expresa.

Artigo 11. Colaboración dos órganos de goberno

1. - Os órganos de goberno e unidades de administración da Universidade colaborarán coa administración electoral na preparación e xestión dos procesos electorais.

2.- Sen prexuízo das funcións atribuídas á Secretaría Xeral en materia electoral polo presente Regulamento, os órganos de goberno unipersoais das facultades e escolas, dos departamentos e das escolas de doutoramento, e en especial as súas secretarías, serán os encargados de preparar e xestionar os procesos electorais nos seus respectivos ámbitos de competencia nas condicións que estableza a Comisión Electoral Central. De ser o caso, terán así como funcións, dentro dos ditos ámbitos:

a) O rexistro dos candidatos e a elaboración dos listados provisionais de candidatos cando así o estableza a Comisión Electoral Central, así como a súa remisión a esta.

b) A elaboración das papeletas de votación conforme aos criterios establecidos polo presente Regulamento e pola Comisión Electoral Central.

c) A provisión dos medios materiais para o correcto desenvolvemento das eleccións.

d) A designación dos electores que estimen máis adecuados para formar parte das mesas electorais no suposto de inasistencias á constitución destas e durante o curso das votacións.

e) A elaboración dos listados e táboas provisionais de resultados cando así o estableza a Comisión Electoral Central, así como a súa remisión a esta.

CAPÍTULO CUARTO. CENSO ELECTORAL

Artigo 12. Disposicións xerais sobre o censo electoral

1.- O censo electoral é permanente. Correspóndelle á Secretaría Xeral de oficio a súa elaboración e actualización como mínimo anual, así como a súa rectificación en período electoral e a adscrición dos electores ás respectivas circunscricións de acordo co disposto neste regulamento. Sen prexuízo do disposto no artigo 24 deste Regulamento, quen acredite un interese directo poderá instar en calquera momento ante a Secretaría Xeral a rectificación dos datos censuais.

2.- Os censos dos órganos de goberno colexiados das facultades, escolas, departamentos, institutos de investigación e escolas de doutoramento, deberán ser actualizados pola Secretaría Xeral respecto das incorporacións ou baixas que non requiran eleccións. Esta actualización non alterará a composición dos demais sectores, con independencia das proporcións asignadas a cada un deles nos Estatutos da Universidade, en tanto non se celebren as correspondentes eleccións.

3.- No censo electoral incluírase o nome e os apelidos dos electores e o número do seu documento oficial de identificación. Esta última mención poderá omitirse na publicación do censo nos taboleiros electorais.

4.- Os candidatos poderán solicitar da Comisión Electoral Central o día seguinte á proclamación definitiva de candidaturas unha copia do censo correspondente aos electores que poden votar a súa candidatura, o cal poderá ser utilizado exclusivamente para fins electorais.

5.- Contra as decisións da Secretaría Xeral en materia electoral caberá recurso diante da Comisión Electoral Central.

Artigo 13. Adscrición ás circunscricións

1.- A adscrición dos electores ás respectivas circunscricións levarase a cabo pola Secretaría Xeral na elaboración dos censos electorais segundo os criterios establecidos no presente



Reglamento, e, en caso de máis dunha posibilidade, atendendo no posible ás preferencias do elector expresadas con anterioridade. Correspóndelle á Comisión Electoral Central resolver as dúbidas que poidan suscitarse sobre as ditas adscricións.

2.- Os membros do persoal docente e investigador (PDI) estarán censados no departamento ao que pertenzan e no centro no que presten a maior parte dos seus servizos. Todos eles deberán estar censados nun único centro e nun único departamento. Así mesmo teranse en conta as seguintes regras:

a) Quen teñan un encargo docente anual no POD igual ou superior a noventa horas en dous ou máis centros, poderán censarse en calquera deles.

b) Quen teña un encargo docente anual no POD inferior a noventa horas en cada un dos centros nos que imparta docencia, poderán censarse en calquera deles.

c) Os membros do PDI poderán solicitar ser censados no centro no que tivesen a súa docencia maioritaria nos dous últimos anos, sempre que manteñan nel algún encargo docente no POD.

d) Os membros do PDI con exención de docencia por cargo académico, ano sabático ou algunha outra causa que non implique perda do dereito de sufraxio, continuarán censados no centro e departamento aos que pertencían. Non obstante, poderán solicitar ser censados no centro no que tivesen a súa docencia maioritaria nos dous últimos anos

e) En todo caso, os membros do PDI poderán optar entre censarse no centro onde desenvolven a meirande parte da súa actividade docente segundo o disposto nas letras a), b), c) e d) deste parágrafo, ou naquel onde teñan outro tipo de vinculación estable. Esta opción unicamente poderá ser exercitada cada tres anos.

3.- Os membros das restantes categorías do persoal docente e investigador detalladas no artigo 3.b) deste Regulamento, agás os investigadores en formación, estarán censados así mesmo nunha das cinco grandes áreas (Ciencias da Saúde, Ciencias, Ciencias Sociais e Xurídicas, Enxeñaría e Arquitectura e Arte e Humanidades), tendo en conta a respectiva adscrición a elas do departamento ao que pertenzan, e de ser necesario tendo en conta tamén o centro no que estean censados.

4.- Os investigadores en formación estarán censados nun único campus (Santiago de Compostela ou Lugo) e nun único departamento e, se fose o caso, tamén nun centro, segundo as seguintes regras:

a) Estarán censados no departamento ao que estean vinculados. Presumirase a vinculación dos investigadores en formación ao departamento no que estean rexistrados.

b) Estarán censados no centro no que impartan docencia, sendo de aplicación as regras para a asignación de centros establecidas para o PDI.

c) Estarán censados, se non tivesen docencia, na escola de doutoramento responsable do programa de doutoramento no que estean matriculados.

5.- Os estudantes de titulacións oficiais estarán censados no centro ou centros responsables da titulación ou titulacións en que estean matriculados e nos departamentos que teñan a súa docencia asignada ás materias nas que estean matriculados, excepto os estudantes de doutoramento.

6.- Os estudantes de doutoramento censaranse na escola de doutoramento responsable do programa de doutoramento no que estea matriculado e nos departamentos ao que pertenza o seu titor de tese.

7.- Os membros do persoal de administración e servizos (PAS) estarán censados no campus (Lugo ou Santiago de Compostela) no que presten servizos e, se é o caso, no centro no que presten servizos. Se prestaren servizos en máis dun centro, poderán optar por calquera deles mediante solicitude ao secretario xeral. Para a adscrición aos censos correspondentes terase en conta a relación de postos de traballo.

8.- Para os efectos de elixir representantes do persoal de administración e servizos nas xuntas de centro e nos consellos de departamento determinarase os membros deste colectivo vinculados respectivamente a cada centro e a cada departamento.

9.- Para os efectos de constituír o comité de dirección das escolas de doutoramento, estarán censados nas respectivas escolas:

a) O persoal docente e investigador da USC en servizo activo vinculados aos programas de doutoramento adscritos á escola nos termos que determina o Regulamento de Estudos de Doutoramento da USC.

b) Os estudantes matriculados nos programas de doutoramento adscritos á escola.

c) O persoal de administración e servizos que desenvolva nela a súa actividade.

10.- Para os efectos de constituír as xuntas de goberno e os consellos científicos, estarán censados en cada instituto de investigación os doutores e titulados superiores vinculados ao mesmo segundo determine o seu regulamento de réxime interno e, no seu defecto, os que presten servizos no instituto.

CAPÍTULO QUINTO. NORMAS COMÚNS DO PROCEDEMENTO ELECTORAL

Artigo 14. Conservación dos actos electorais

1.- Os vicios do procedemento electoral unicamente producirán a nulidade de actuacións cando sexan determinantes do resultado da elección.



2.- A invalidez da votación nunha ou varias mesas ou eleccións parciais non producirá a nulidade da elección cando esta invalidez non alterase o resultado final.

Artigo 15. Votos válidos, nulos e en branco

1.- O voto exércese indicando inequivocamente a preferencia por un ou varios candidatos, segundo corresponda. No caso de existir papeleta oficial, o elector marcará cunha cruz o recadro correspondente ao candidato ou candidatos aos que outorgue o seu voto.

2.- Considérase voto nulo:

a) O emitido en sobre ou papeleta diferente do modelo oficial.

b) O emitido en papeleta sen sobre, cando este é preceptivo, ou o emitido en sobre que conteña máis dunha papeleta con distintos candidatos.

c) O emitido en papeleta na que conste un número de marcas superior ao número máximo de candidatos que o elector poida votar.

d) O emitido en papeleta con rascaduras, emendas, modificacións ou calquera outro tipo de alteración que impida coñecer con claridade a efectiva vontade do elector. De ser o caso, a nulidade só afectará ao nome ou nomes respecto aos que se suscite a dúbida.

e) O emitido en sobre con signos externos de recoñecemento.

f) O voto no que se conteña calquera outra expresión allea ao voto.

3. - Nas votacións electrónicas non existirá o voto nulo.

4.- Considérase voto en branco, pero válido:

a) O emitido en sobre que non conteña papeleta.

b) O emitido en papeleta que dea a opción de votar en branco.

c) O emitido en papeleta ou papeletas que non conteñan indicación a favor de ningún dos candidatos que permita coñecer a preferencia do votante.

d) O voto a unha candidatura legalmente retirada.

5.- No suposto de que o sobre conteña máis dunha papeleta a favor do mesmo candidato ou candidatos, computarase como un só voto válido. No caso de que xunto a unha papeleta adecuadamente cuberta o sobre conteña outra ou outras en branco, entenderase que a papeleta cuberta é válida e non se terán en conta as restantes.

Artigo 16. Cómputo de prazos e procedemento



1.- Nas eleccións ás que se refire o artigo 1 deste Regulamento, considéranse períodos inhábiles o de exames oficiais en toda a Universidade, os meses de xullo e agosto e os días dos meses de setembro anteriores ao inicio do curso académico, así como os de suspensión da actividade docente segundo o establecido no calendario académico aprobado polo Consello de Goberno.

2.- Agás disposición en contrario, os prazos sinalados por días neste Regulamento computaranse en días hábiles e os sinalados por meses de data a data, excluindo os meses inhábiles. Para o cómputo dos prazos, os sábados serán días hábiles, se ben cando un prazo termine en sábado prorrogarase ata o primeiro día hábil seguinte.

3.- En todo o non expresamente regulado por este regulamento en materia de procedemento será de aplicación a Lei de Réxime Xurídico das Administracións Públicas e do Procedemento Administrativo Común. Será así mesmo de aplicación subsidiaria, cando proceda, a Lei Orgánica do Réxime Electoral Xeral.

Artigo 17. Secreto do voto

1.- Nos procedementos electorais sometidos ao presente regulamento o voto será secreto.

2.- Cada elección realizarase nunha urna diferenciada, que terá as características necesarias para garantir o segredo e pureza da votación. Cando polas características da elección deban reunirse nunha mesma urna os votos de máis de un sector, subsector ou circunscrición electoral, diferenciaranse as papeletas mediante cores ou marcas que faciliten distinguilas.

Artigo 18. Soporte e financiamento das actividades electorais

1.- Ao longo do proceso electoral garantirase a igualdade dos candidatos no acceso aos medios de que dispoña a Universidade para o desenvolvemento do proceso.

2.- O financiamento das actividades electorais deberá ser transparente e en ningún caso deberá comprometer a autonomía da Universidade. A Comisión Electoral, cando proceda, exercerá o control e fiscalización dos gastos electorais.

Artigo 19. Infraccións electorais

O reitor exercerá a potestade disciplinaria naqueles casos de incumprimento da normativa establecida neste regulamento ou da negativa a asumir os deberes establecidos no mesmo.

CAPÍTULO SEXTO. TITULARIDADE DOS POSTOS ELECTOS

Artigo 20. Principios xerais

1.- Os titulares ou membros de órganos de goberno electos perderán esta condición no momento en que deixen de cumprir os requisitos esixidos para seren elixidos.



2.- Para o desempeño de cargos estarase ao disposto no artigo 71 dos Estatutos da Universidade.

3.- Ata a constitución dos órganos colexiados electos, continuarán en funcións os anteriores.

4.- Os efectos administrativos e económicos do candidato electo, cando procedan, computaranse dende o momento en que o órgano competente o nomee, agás que este dispoña expresamente unha data de efectos anterior, que en todo caso será posterior á data da proclamación definitiva como electo.

Artigo 21. Perda da condición de cargo unipersoal

1.- Sen prexuízo do disposto nas restantes normas aplicables, a condición de órgano de goberno unipersoal de carácter electivo, que é persoal e intransferible, perderase por:

- a) Renuncia.
- b) Extinción do mandato.
- c) Disolución do órgano colexiado que o elixiu.
- d) Deixar de pertencer á universidade.
- e) Ser nomeado para o desempeño doutro cargo unipersoal.
- f) Inhabilitación para o cargo por sentenza ou resolución administrativa firme.
- g) Xubilación.
- h) Falecemento.
- i) Agás no caso do reitor, aprobación dunha moción de censura construtiva por maioría absoluta.
- l) Perda da condición de servizo activo na Universidade de Santiago de Compostela no caso do persoal funcionario ou a situación equivalente no persoal laboral.
- m) Deixar de pertencer ás categorías, corpos docentes ou escalas de funcionarios que sexan esixidas pola lexislación vixente para ocupar ese cargo.
- n) Cambiar de dedicación de tempo completo a tempo parcial.
- ñ) Deixar de estar matriculado na modalidade de matrícula ordinaria nunha titulación oficial, no caso dos estudantes.
- o) No caso do persoal de administración e servizos, ter outro emprego.

2.- Segundo o disposto no artigo 71.2 dos Estatutos da Universidade, en ningún caso se poderá exercer a titularidade de máis dun órgano de goberno unipersoal, nin a de calquera deles simultaneamente coa de órganos de goberno unipersoais doutra universidade ou do Consello Superior de Investigacións Científicas e dos seus centros respectivos, ou coa de representante sindical.

3.- No caso de cesamento o reitor resolverá, con carácter xeral, a continuidade en funcións do anterior titular ata a elección da persoa que o substitúa.

4.- Cando se produza o cesamento do cargo dun órgano de goberno unipersoal, tamén cesarán do seu cargo os que fosen nomeados a proposta daquel, se ben continuarán en funcións ata ser confirmados ou substituídos polo novo titular que substitúe ao cesante.

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario.

Artigo modificado: Artigo 21 apartado 1 b) nova redacción por artigo único apartado tres.

Artigo 22. Perda da condición de membro de órganos colexiados

1.- A condición de membro de órganos colexiados de carácter electivo, que é persoal e intransferible, perderase por:

- a) Falecemento ou incapacitación declarada esta por sentenza firme.
- b) A renuncia expresa dun membro do órgano colexiado correspondente, que se formalizará por escrito.
- c) O cesamento da vinculación coa Universidade de Santiago de Compostela.
- d) Perda da condición de servizo activo na Universidade de Santiago de Compostela no caso do persoal funcionario ou a situación equivalente no persoal laboral.
- e) Deixar de pertencer ao sector ou subsector da comunidade polo que se foi elixido; ou no caso dos membros do sector III tamén á circunscrición.
- f) Extinción do mandato.
- g) Disolución do órgano colexiado.
- h) Inhabilitación por sentenza ou resolución administrativa firme.
- i) Sentenza firme que anule a elección pola que foi designado

j) Polo incumprimento grave das súas obrigas, nos termos que sinala a normativa reguladora do órgano de acordo cos criterios xerais dispostos no apartado 3 do presente artigo.

k) Por calquera outra causa prevista na normativa electoral que sexa de aplicación.

2.- No caso de perda da condición de membro dun órgano colexiado dun representante electo, será nomeado membro, ata o final do período, o seguinte candidato máis votado do mesmo sector ou subsector e circunscrición. Correspóndelle á Secretaría Xeral, unha vez coñecida a existencia dunha vacante, dar de baixa no órgano aos representantes que perdesen a condición de membros do mesmo e, de ser o caso, incorporar como membros aos substitutos. Desta actuación dará conta á Comisión Electoral Central. Se non houberse substitutos que reúnan os requisitos esixibles para formar parte do órgano, a vacante manterase ata a celebración das seguintes eleccións que correspondan. O secretario xeral comunicará aos afectados a súa baixa ou incorporación. Estes poderán interpoñer recurso de reposición ante a Comisión Electoral Central.

3.- Os regulamentos internos dos órganos colexiados poderán establecer a perda da condición de membro dos mesmos no caso de inasistencia reiterada e inustificada ás súas reunións, falta de consideración grave á presidencia ou aos restantes membros do órgano, incumprimento do deber de sxiilo cando exista, ou por outras faltas establecidas no réxime sancionador correspondente. A decisión tomarase motivadamente por acordo do órgano.

TÍTULO II. ELECCIÓN DO REITOR OU REITORA E DOS REPRESENTANTES EN ÓRGANOS COLEXIADOS

CAPÍTULO PRIMEIRO. PROCEDEMENTO XERAL

Artigo 23. Convocatoria das eleccións

1.- As resolución de convocatoria das eleccións reguladas neste Título deberá conter polo menos as seguintes indicacións:

- a) Data de exposición pública do censo electoral.
- b) Prazo de presentación de recursos contra o censo, e prazo da súa resolución.
- c) Data de publicación do censo definitivo.
- d) Prazo de presentación de candidaturas.
- e) Data de proclamación provisoria de candidatos.



- f) Prazo de presentación de recursos contra o acto de proclamación provisoria de candidatos e de resolución dos mesmos.
- g) Data de proclamación definitiva de candidatos.
- h) Data do sorteo para a designación dos membros das mesas electorais.
- i) Prazo para exercer o voto anticipado.
- k) Prazo da campaña electoral e data da xornada de reflexión.
- l) Data da votación, que será dentro do período hábil segundo o previsto no artigo 16 deste Regulamento. Nas eleccións que poidan requirir unha segunda volta, indicárase tamén a data desta dentro do indicado período hábil.
- m) Lugar onde se celebrarán as votacións e horario durante o que se desenvolverán.
- n) Data de proclamación provisional de candidatos electos.
- o) Prazo de presentación de recursos contra a proclamación provisional de candidatos electos, e prazo de resolución destes.

2.- A convocatoria e os actos derivados da mesma publicaranse Taboleiro Electrónico de Anuncios da Universidade e, de ser o caso, nos taboleiros de anuncios correspondentes. Así mesmo, a data de referencia para os efectos de cómputo de prazos e cumprimento do disposto neste Regulamento será a da publicación no devandito Taboleiro Electrónico de Anuncios.

Artigo 24. Publicación e impugnación do censo electoral

- 1.- Para o exercicio do dereito de sufraxio nas eleccións de reitor ou reitora e de representantes en órganos colexiados, será necesaria a inclusión no censo electoral correspondente.
- 2.- Para cada elección utilizarase o censo electoral vixente no día da convocatoria. Este censo será publicado de xeito completo incluso no caso de utilizar para tal fin o Taboleiro Electrónico de Anuncios da Universidade.
- 3.- As listas do censo expoñeranse publicamente nas sedes centrais da Universidade e nos centros nos tres días seguintes á convocatoria de eleccións, e permanecerán expostas durante un mínimo de cinco días. Tamén poderán publicarse temporalmente no Taboleiro Electrónico de Anuncios da Universidade.
- 4.- Unha vez publicado o censo, os titulares do dereito de sufraxio poderán presentar reclamacións sobre os datos ante o secretario xeral, no prazo que determine a convocatoria, que será polo menos de tres días e non poderá rematar antes dos cinco días seguintes á

publicación do censo. O secretario xeral resolverá as reclamacións e realizará as rectificacións que procedan nos dous días seguintes de que remate o prazo de reclamacións. Contra a resolución da Secretaría Xeral caberá recurso no prazo de tres días ante a Comisión Electoral Central, que os resolverá nos tres días seguintes de rematado este prazo.

Artigo 25. Presentación de candidaturas

1.-Poderán presentar a súa candidatura as persoas que ostenten a condición de elixibles conforme ao establecido neste Regulamento e na restante normativa aplicable.

2.- As candidaturas presentaranse no Rexistro Xeral da Universidade ou no seu Rexistro Electrónico, en horario hábil, mediante escrito dirixido ao presidente da Comisión Electoral Central, no prazo de oito días dende a publicación do censo definitivo. Tamén poderán presentarse, nas mesmas condicións, nos rexistros dos centros, no caso de eleccións de representantes nas xuntas de centro.

3.- As candidaturas presentadas non poderán ser obxecto de modificación unha vez rematado o seu prazo de presentación, agás por renuncia do candidato. Neste último caso e no de falecemento do candidato con anterioridade ao día da votación, a Comisión Electoral Central poñerá en coñecemento das mesas electorais correspondentes, para os efectos derivados da aplicación do presente Regulamento.

4.-O escrito de presentación de cada candidatura, que ten carácter persoal e estará asinado polo interesado, axustarase ao modelo establecido pola Comisión Electoral Central. O escrito deberá conter como mínimo os seguintes datos:

- a) Nome e apelidos do candidato.
- b) Número do documento nacional de identidade.
- c) Proceso electoral.
- d) Sector e, se é o caso, subsector polo que se presenta como candidato.

5.- De cara á presentación, votación e escrutinio, as candidaturas serán individuais. Nas eleccións de representantes en órganos colexiados, os candidatos poderán agruparse para os únicos efectos de realizar a campaña electoral e de nomear interventores. No primeiro suposto, indicárase no escrito de presentación de candidaturas a denominación ou sigla que identifique á agrupación, entendéndose concedida a conformidade á inclusión de aquela identificación na papeleta electoral.

Se existise coincidencia na denominación ou na sigla empregadas por dúas ou máis agrupacións, será resolta pola Comisión Electoral Central consonte á normativa sectorial ou, no seu defecto, xeral aplicable. De ser o caso, terase en conta a inscrición ou non da asociación e o momento da presentación.

Artigo 26. Proclamación de candidatos e recursos



1.- Finalizada a presentación de candidaturas, a Comisión Electoral Central procederá no prazo de tres días á cualificación e proclamación provisoria de candidatos. A proclamación indicará de forma individualizada, polo menos, o nome do candidato e, se é o caso, o do suplente e a sigla ou denominación que identifique á agrupación á que aquel pertence. Así mesmo, a comisión electoral, no indicado prazo, publicará unha relación dos candidatos non proclamados con expresión da causa da súa non proclamación. Non procederá a proclamación de candidaturas que incumpran os requisitos sinalados no artigo anterior.

2.- No prazo de tres días dende a proclamación provisoria, os candidatos proclamados e os excluídos poderán interpor recurso ante a Comisión Electoral Central, que resolverá no prazo de tres días procedendo á proclamación definitiva. A proclamación provisoria de candidatos devirá definitiva, así mesmo, se no prazo regulamentariamente establecido non fose obxecto de recurso.

Artigo 27. Voto anticipado nas eleccións a reitor

1.- Nas eleccións a reitor admitirase o voto anticipado dos titulares do dereito de sufraxio que non poidan exercelo na data da votación prevista na convocatoria de eleccións. O voto anticipado entregarase persoalmente polo elector no Rexistro Xeral da Universidade previa identificación cun documento oficial, nun sobre pechado dirixido ao Secretario Xeral, quen disporá a súa custodia e entrega na mesa electoral correspondente o día da votación.

2.- Para emitir o voto anticipado os electores interesados retirarán persoalmente no Rexistro Xeral da Universidade a papeleta de voto, o sobre de votación e o sobre exterior para dirixir o voto, no que deberá identificarse claramente a votación, o votante, e a mesa electoral na que lle corresponda votar. No sobre exterior introducirase o sobre coa papeleta de votación e unha fotocopia dun documento oficial de identificación do elector.

3.- O voto anticipado poderá exercerse no prazo indicado na convocatoria, e en todo caso ata dous días antes da votación.

4.- Na data da votación, a Secretaría Xeral fará chegar os votos anticipados aos presidente das mesas electorais correspondentes, que unha vez rematada a votación ordinaria os introducirán na urna que proceda logo de comprobar a inclusión do votante no censo e facer a oportuna anotación.

En ningún caso se introducirá o voto se o elector xa consta como votante.

Artigo 28. Campaña electoral

1.- Os órganos de goberno da Universidade que en virtude da súa competencia convocasen un proceso electoral poderán realizar durante o período electoral unha campaña destinada a informar ao correspondente corpo electoral sobre a data da votación e o procedemento para votar e incentivar a participación, sen incluír, en ningún caso, a orientación do voto dos electores.

2.- Enténdese por campaña electoral o conxunto de actividades lícitas levadas a cabo polos candidatos en orde á captación de sufraxios.

3.- A campaña electoral comezará ao día seguinte da proclamación definitiva dos candidatos e terminará ás cero horas do día inmediatamente anterior ao da votación, debendo ter unha duración mínima de cinco días. A campaña electoral non poderá comprender os períodos descritos no artigo 16 deste Regulamento. Así mesmo, nin poderá difundirse propaganda electoral nin realizarse acto ningún solicitando o voto fóra do período de campaña electoral.

4.- Os responsables dos centros facilitarán o desenvolvemento das reunións ou actividades electorais. Cando estas poidan implicar algunha alteración da actividade docente, investigadora, administrativa ou laboral, os proponentes do acto solicitarán a correspondente autorización ao xerente, ou ao decano ou director do centro ou departamento, dependendo do lugar onde se vaia realizar a reunión ou actividade solicitada. A autorización ou denegación da solicitude deberá producirse por escrito no día seguinte á súa presentación, e poderá impugnarse ante o presidente da Comisión Electoral Central no prazo de dous días. A impugnación deberá resolvela o presidente da Comisión no prazo dos dous días seguintes á súa presentación, esgotando a vía administrativa.

Sección primeira. Organización da votación

Artigo 29. Mesas Electorais

1.- As Mesas electorais coincidirán coa circunscrición e serán únicas para cada sector ou subsector. Non obstante, para as eleccións de reitor serán as mesmas que para as eleccións de representantes do Claustro Universitario; e para as eleccións de representantes de estudantes nos consellos de departamento, estableceranse mesas en cada centro.

2.- Cando nunha circunscrición o número de electores dun sector exceda de 500, este poderá dividirse en varias mesas, sempre que o número de electores de cada unha delas non sexa inferior a 200. Cando as circunscricións sexan as grandes áreas garantirase a existencia de polo menos unha mesa electoral en cada campus sempre e cando o número de electores na mesma sexa superior a 10.

3. - Corresponde ás mesas electorais presidir a votación, conservar a orde, realizar o escrutinio e velar pola pureza do sufraxio no seu respectivo ámbito de actuación.

4.- Cada mesa electoral estará formada por un presidente e dous vogais, designados por sorteo entre os electores que han de emitir o seu voto nela. A Comisión Electoral Central realizará o sorteo, que será público, con dez días de antelación á celebración das votacións, e designará un presidente e dous vogais suplentes ademais dos titulares. Non entrarán no sorteo aqueles electores que presenten a súa candidatura nin quen forme parte da Comisión Electoral Central. Cando a composición da mesa o permita, será designado presidente un membro do persoal da Universidade.



5.- A designación como presidente e vogal das mesas electorais notificarase aos designados no prazo de tres días da celebración do sorteo, xunto cun manual de instrucións sobre as súas funcións. O cargo é obrigatorio. Non obstante, ata as setenta e dúas horas previas a celebración das votacións os designados poderán alegar ante a Comisión Electoral Central causa xustificada e documentada que lles impida a aceptación do cargo. As causas serán apreciadas pola comisión electoral, que de admitilas designará ao suplente e procederá ao sorteo dun novo vogal.

6.- Se non fose posible compoñer a mesa electoral conforme ao indicado nos apartados anteriores, a Comisión Electoral Central procederá a designación directa dos membros consonte o establecido no artigo seguinte.

7.- O persoal ao servizo da Universidade nomeado presidente ou vogal das mesas electorais ten dereito durante o día da votación e o día inmediatamente posterior a un permiso retribuído de xornada completa, se non goza en tales datas do descanso semanal.

8.- Para o caso de votacións electrónicas estarase ao establecido no Título IV.

Artigo 30. Constitución das Mesas Electorais

1.- O presidente e os vogais de cada mesa electoral, así como os seus correspondentes suplentes, reuniranse unha hora antes do inicio da votación no local asignado para esta pola Comisión Electoral Central.

2.- Se o presidente non acudira, asumirá a presidencia o seu suplente e, no seu defecto, o primeiro vogal ou o segundo vogal, por esta orde. Os vogais que non acudisen ou que tomasen posesión como presidentes serán substituídos polos seus suplentes.

3.- En ningún caso poderá constituírse a mesa electoral sen a presenza dun presidente e dous vogais. En caso de que non poida cumprirse este requisito, e sen prexuízo da posible responsabilidade dos que non compareceran, os membros da mesa presentes, os suplentes que acudisen ou, no seu defecto, os órganos de goberno que teñan coñecemento da circunstancia, asinarán unha declaración dos feitos e comunicaran a Comisión Electoral Central. En tal caso, a Comisión Electoral Central ou o órgano de goberno a quen corresponda designará libremente ás persoas que haberán de constituír a mesa electoral, podendo incluso ordenar que forme parte dela algún dos electores presentes no local.

4.- Antes de iniciar a votación, o presidente fará constar na acta a constitución da mesa electoral.

Na acta expresarase necesariamente con que persoas queda constituída a mesa en concepto de membros e a relación nominal dos interventores, con indicación da candidatura pola que o sexan.

Así mesmo, se fose preciso, comunicará inmediatamente á Comisión Electoral Central a falta no local electoral de calquera dos elementos necesarios para a votación.

5.- No transcurso das votación estarán presentes un mínimo de dous membros da mesa. Se fose preciso para asegurar este mínimo, excepcionalmente supliranse as ausencias de acordo co previsto no apartado terceiro.

Artigo 31. Interventores

1.- Os candidatos, tanto a órganos colexiados como a unipersoais, poderán designar, ata tres días antes da elección, un máximo de dous interventores por cada mesa electoral en que poida votarse a súa candidatura, solicitando da Comisión Electoral Central a expedición de credenciais no modelo ou modelos que estableza para o efecto. Para ser designado interventor é preciso estar inscrito no censo electoral e, agás nas eleccións de reitor ou reitora, pertencer ao mesmo sector ou subsector de representación que o candidato ou candidatos.

2.- As credenciais por cada interventor serán expedidas polo presidente da Comisión Electoral Central por cuadruplicado logo de comprobar que reúne os requisitos para exercer de tales. Un dos exemplares quedará en poder da Comisión; outro poderá retiralo o propio candidato ou o interventor o día anterior á votación; e os restantes remitiranse á mesa electoral ante a que se acredita o interventor e á mesa na que lle correspondería votar, para a súa exclusión da mesma, de modo que obren no poder das mesas antes de constituírense o día da votación. De non reunir os requisitos esixidos para actuar como interventor, a Comisión Electoral Central comunicarao ao candidato e á mesa correspondente.

3.- Poderán nomearse interventores para representar a varios candidatos. Esta previsión será de obrigado cumprimento para os que concorran cunha mesma denominación ou sigla e autorizasen a identificación da súa agrupación na papeleta electoral. A designación de interventores comúns a varios candidatos requirirá a conformidade de todos eles expresada por escrito, que se remitirá xunto coa solicitude das credenciais á Comisión Electoral Central.

4.-Un interventor de cada candidatura pode asistir á Mesa Electoral, participar nas súas deliberacións con voz pero sen voto e exercer ante ela os demais dereitos previstos por este regulamento. Para estes efectos, os interventores dunha mesma candidatura acreditados ante a mesa poden substituírense libremente entre si.

5.- Os interventores exercen o seu dereito de sufraxio na mesa ante a que estean acreditados, agás no caso de votacións electrónicas.

6.- O persoal ao servizo da Universidade que acredite a súa condición de interventor en procedementos electorais non electrónicos ten dereito durante o día da votación a un permiso retribuído da xornada completa, se non goza en tal data do descanso semanal, e a unha redución da súa xornada de traballo de cinco horas o día inmediatamente posterior.

Artigo 32. Acreditación de interventores

1.- Reunidos o presidente e os vogais, procederán a recibir as credenciais dos interventores que se presenten ata 15 minutos antes da hora fixada para o inicio da votación e confrontaranas coas copias que obren no seu poder. Se as encontran conformes, admitirán

aos interventores na mesa electoral. Se o presidente non recibise as copias ou lle ofrecese dúbida a autenticidade das credenciais, a identidade dos presentados, ou ambos os dous extremos, daralles posesión se así o esixen, pero consignando na acta a súa reserva para o esclarecemento pertinente, e para esixirlles, se fose o caso, a responsabilidade correspondente.

2.- Se se presentan máis de dous interventores por unha mesma candidatura, só dará posesión o presidente ao que primeiro presente as súas credenciais, que para este fin numerará por orde cronolóxica de presentación.

3.- As copias das credenciais recibidas polo presidente deberán achegarse ao expediente electoral.

As credenciais exhibidas polos interventores, unha vez cotexadas polo presidente, seranlle devoltas a aqueles. Se o presidente non recibise a copia das credenciais, as presentadas polos interventores achegaranse ao expediente electoral ao finalizar o escrutinio.

4.- Se o interventor se presentase na mesa electoral despois da hora sinalada no parágrafo 1 deste artigo, unha vez confeccionada a acta de constitución da mesma, o presidente non lle dará posesión do seu cargo, se ben poderá votar na dita mesa.

Artigo 33. Papeletas e sobres en procesos electorais non electrónicos

1.- A Comisión Electoral Central aprobará o modelo oficial das papeletas e sobres electorais, procurando a clara diferenciación das distintas eleccións e dos distintos sectores e subsectores.

2.- A confección das papeletas iniciárase inmediatamente despois da proclamación definitiva de candidatos, debendo estar a disposición destes e dos electores con cinco días, polo menos, de antelación á data da celebración da votación.

3.- Na papeleta oficial de votación deberá constar o nome dos candidatos ordenados alfabeticamente segundo a letra do primeiro apelido e en idénticos caracteres de imprenta.

Os nomes estarán precedidos dun recadro en branco e, se é o caso, seguidos da denominación ou sigla que identifique a súa agrupación electoral. A orde de inscrición alfabética de apelidos farase a partir da letra que se determine no sorteo que para os efectos realice a Comisión Electoral Central.

4.- Os sobres deberán manter correspondencia coas papeletas. Cando menos nos procesos electorais en que coincidan votación a máis dun órgano colexiado, os sobres levarán impresa a denominación correspondente a cada órgano.

5.- Os locais de votación disporán dun número suficiente de sobres e de papeletas, que deberán axustarse ao modelo oficialmente establecido.

Sección segunda. Votación

Artigo 34. Xornada de votación en procesos electorais non electrónicos

1.- Estendida a acta de constitución da mesa electoral, coas súas correspondentes copias, iniciárase a votación coas palabras do presidente "empeza a votación". Esta celebrárase entre as dez trinta horas e as dezoito trinta horas sen interrupción, sen prexuízo de que na convocatoria fíxase outra hora de comezo ou remate, ou que con anterioridade á hora prevista para o remate emitisen o seu voto a totalidade dos electores censados na correspondente mesa. Neste caso, pecharase o local de votación e o presidente da mesa electoral asistido polos vogais solicitará autorización á Comisión Electoral Central para dar por terminada a votación, asegurándose de que a urna se manteña incólume ata a hora de comezo do escrutinio e deixará constancia dos feitos na acta de peche da votación.

2.- Só por causas de forza maior poderá non iniciarse ou suspenderse, unha vez iniciado, o acto da votación, sempre baixo a responsabilidade do presidente da mesa electoral, o cal motivará por escrito a súa decisión. Do dito escrito o presidente fará chegar, en todo caso, unha copia en man, e inmediatamente despois de estendelo, á Comisión Electoral Central para que esta comprobe a certeza e suficiencia dos motivos e, de ser o caso, inste do reitor a incoación do procedemento para esixir as responsabilidades que procedan.

3.- En caso de suspensión da votación non se terán en conta os votos emitidos na mesa electoral, nin se procederá ao seu escrutinio, ordenando o presidente inmediatamente a destrución das papeletas depositadas na urna, e consignando este extremo no escrito ao que se refire o parágrafo anterior.

4.- Non obstante o disposto no parágrafo 2 deste artigo, o presidente deberá interromper a votación cando advirta a ausencia de papeletas. En tal caso, dará conta da súa decisión á Comisión Electoral Central ou aos órganos de goberno do centro ou departamento, segundo proceda, para que provean a súa subministración. A interrupción non poderá durar máis dunha hora e a votación prorrogarase tanto tempo como estivese interrompida. Neste suposto, non é de aplicación o parágrafo 3 deste artigo.

5.- Á hora fixada para o peche da votación, o presidente anunciará en voz alta que vai concluír a votación. Se algún dos electores que se atopen no local ou no acceso ao mesmo non votou aínda, o presidente admitirá que o fagan e non permitirá que vote ninguén máis. Seguidamente o presidente introducirá os votos anticipados, se os houberse, segundo o previsto no artigo 27 deste Regulamento. A continuación, votarán os membros da mesa electoral e os interventores, se os houberse, especificándose na lista numerada de votantes a mesa electoral que correspondería aos interventores que non figuren no censo da mesa.

Artigo 35. Mantemento da orde en procesos electorais non electrónicos



1.- O presidente da mesa electoral ten dentro do local electoral autoridade exclusiva para conservar a orde, asegurar a liberdade dos electores e manter a observancia do establecido neste regulamento. Así mesmo, velará por que a entrada ao local se conserve sempre libre e accesible para as persoas que teñen dereito a entrar nel.

2.- Só teñen dereito a entrar no local electoral os electores, os candidatos, os interventores, os encargados da orde que para tal efecto designe a Universidade ou requira o presidente da mesa, os membros da Comisión Electoral Central e, se fose o caso, os notarios.

3.- Nin nos locais electorais nin nas súas inmediacións se poderá realizar propaganda electoral de ningún xénero. Tampouco poderán formarse grupos susceptibles de entorpecer o acceso aos locais, nin se admitirá a presenza nas proximidades de quen poida dificultar ou coaccionar o libre exercicio do dereito de voto. O presidente da mesa electoral tomará a este respecto todas as medidas que estime convenientes.

4.- Calquera incidente que afectase á orde nos locais electorais recollerase na acta da sesión, incluíndo, se constasen, o nome e os apelidos dos que o provocasen.

Artigo 36. Identificación dos electores en procesos electorais non electrónicos

1.- O dereito a votar acredítase pola inscrición nos exemplares certificados das listas do censo ou por certificación censual específica e, en ambos os dous casos, pola identificación do elector, que se realiza mediante documento nacional de identidade, pasaporte, permiso de conducir ou carné da Universidade en que apareza a fotografía do titular.

2.- Cando a mesa electoral teña dúbida sobre a identidade do individuo que se presente a votar, decidirá por maioría á vista dos documentos acreditativos e da testemuña que poidan presentar os electores presentes.

3.- A certificación censual específica, a través da cal o elector acredita con carácter excepcional a súa inscrición no censo electoral, expedirase pola Secretaría Xeral, no modelo que aprobe a Comisión Electoral Central, a solicitude persoal do elector, ata o mesmo día da votación, antes da hora do peche do colexio electoral, sempre que figurando o elector inscrito no censo electoral, non apareza pola razón que sexa, na lista entregada á mesa electoral.

Artigo 37. Emisión do voto en procesos electorais non electrónicos

1.- O voto é segredo, persoal e intransferible e non se poderá exercer por delegación nin de forma anticipada, agás conforme ao previsto no artigo 27 deste Regulamento.

2.- En cada xornada electoral, os electores disporán de dúas horas para exercer o seu dereito de voto, podendo solicitar da mesa electoral o correspondente xustificante da emisión do mesmo.

3.- Os electores só poden votar no sector ou subsector e mesa electoral que lles corresponda, sen prexuízo do disposto para os interventores. Os electores achegaranse á mesa electoral de un en un, despois de elixiren as papeletas electorais e introducilas nos correspondentes sobres.

4.- Os electores que por discapacidade física estean impedidos para elixiren a papeleta, colocala dentro do sobre ou entregala ao presidente da mesa poden servirse para estas operacións dunha persoa de confianza. A disposición das urnas farase de xeito que poidan acceder a elas as persoas con mobilidade reducida.

5.- Cada elector manifestará o seu nome e apelidos ao presidente. Un vogal e os interventores comprobarán, polo exame das listas do censo electoral ou das certificacións achegadas, o dereito a votar do elector, así como a súa identidade, que se xustificará conforme ao disposto no artigo anterior. Inmediatamente o elector entregará pola súa propia man ao presidente o sobre ou sobres de votación pechados. A continuación este, sen ocultalos nin un momento da vista do público, dirá en voz alta o nome do elector e depositará na urna ou urnas os correspondentes sobres.

6.- O vogal que o presidente designe e, de ser o caso, os interventores que o desexen anotarán, cada cal nunha lista numerada, o nome e apelidos dos votantes pola orde en que emitan o seu voto, expresando o número co que figuran na lista do censo electoral ou, de ser o caso, a achega de certificación censual específica. Todo elector ten dereito a examinar se foi ben anotado o seu nome e apelidos na lista de votantes. O membro da mesa electoral encargado da comprobación dos votantes no censo electoral fará un sinal na lista, a medida que vota cada elector.

7.- Rematada a votación segundo o disposto no apartado 5 do artigo 34 deste Regulamento, os vogais e interventores asinarán as listas numeradas de votantes á marxe de todos os seus pregos e inmediatamente debaixo do último nome escrito.

Artigo 38. Escrutinio en procesos electorais non electrónicos

1.- Finalizada a votación, comeza, acto seguido, o escrutinio, segundo o establecido no artigo 15 deste Regulamento.

2.- O escrutinio será público e non se suspenderá, salvo causas de forza maior. O presidente ordenará a inmediata expulsión das persoas que de calquera modo entorpezan ou perturban o desenvolvemento do escrutinio.

3.- O escrutinio realízase extraendo o presidente da mesa, un a un, os sobres da urna correspondente e lendo en voz alta o nome dos candidatos votados. O presidente poñerá de manifesto cada papeleta, unha vez lida, aos vogais e interventores.

4.- Se algún interventor ou candidato tivese dúbidas sobre o contido dunha papeleta lida polo presidente, poderá pedila no acto para o seu exame e concederáselle que a examine.

Artigo 39. Fin do recento en procesos electorais non electrónicos

- 1.- Finalizado o recento, confrontarase o total de sobres co de votantes anotados.
- 2.- A continuación, o presidente preguntará se hai algunha protesta que facer contra o escrutinio e, non habendo ningunha ou despois de que a mesa electoral resolva por maioría as que se presentaran, anunciará en voz alta o seu resultado, especificando o número de electores censados, o de certificacións censuais achegadas, o número de votantes, o de papeletas nulas, o de votos en branco e o dos votos obtidos por cada candidato.
- 3.- As papeletas extraídas das urnas destruíranse en presenza dos concorrentes con excepción daquelas ás que se lle negase validez ou que fosen obxecto dalgunha reclamación, as cales se achegarán á acta e arquivaranse con ela, unha vez rubricadas polos membros da mesa electoral.

Artigo 40. Acta de escrutinio en procesos electorais non electrónicos

- 1.- Logo de rematado o escrutinio, a Mesa Electoral fará públicos inmediatamente os resultados por medio dunha acta de escrutinio que conteña os datos expresados no apartado 2 do artigo anterior, e fixaraa sen demora na parte exterior ou na entrada do local, ou no taboleiro electoral correspondente. Unha copia da dita acta entregárase aos interventores e aos candidatos que, estando presentes, a soliciten. Non se expedirá máis dunha copia por candidatura ou, se fose o caso, por agrupación de candidaturas.
- 2.- Expedírase así mesmo, se é o caso, unha copia da acta de escrutinio á persoa designada pola Universidade para recibila, e para os efectos de facilitar a información provisional sobre os resultados da elección. Poderá preverse a transmisión dos resultados do escrutinio por medios telemáticos.

Artigo 41. Acta da sesión en procesos electorais non electrónicos

- 1.- Concluídas todas as operacións anteriores, o presidente, os vogais e os interventores da mesa electoral estenderán a acta da sesión, na que se expresará:
 - a) O número de electores que haxa na mesa electoral segundo as listas do censo electoral e as certificacións censuais achegadas.
 - b) O número dos electores que votaron e dos interventores que votaron non figurando na lista da mesa electoral
 - c) O número de votos nulos.
 - d) O número de votos en branco.
 - e) O número de votos obtidos por cada candidato

f) Un resumo das reclamacións e protestas formuladas, de ser o caso, polos candidatos, interventores ou electores sobre a votación e o escrutinio, así como as resolucións motivadas da mesa electoral sobre elas, cos votos particulares se os houbera.

g) Calquera incidente que se producise.

2.- Da acta da sesión, que formará parte do expediente electoral especificado no artigo seguinte, faranse polo menos dúas copias. Unha delas quedará en poder do presidente da mesa electoral e a outra enviarase ao secretario do centro ou departamento ou ao secretario xeral da Universidade, dependendo do procedemento electoral de que se trate.

3.- Todos os candidatos e interventores teñen dereito a que se lles expida gratuitamente copia da acta, non podendo escusarse a mesa electoral do cumprimento desta obriga.

Artigo 42. Expediente electoral en procesos electorais non electrónicos

1.- Unha vez estendida a acta da sesión, a mesa electoral procederá á preparación do expediente electoral, que se compoñerá dos seguintes documentos:

a) O orixinal da acta da sesión, na que figurará a constitución da mesa electoral, o resultado do escrutinio e as incidencias relevantes do desenvolvemento da sesión.

b) Os documentos a que faga referencia a acta da sesión e, en particular, as copias das credenciais dos interventores ás que se refire o artigo 32.3 deste Regulamento, a lista numerada de votantes e as papeletas ás que se negase validez ou que fosen obxecto dalgunha reclamación.

c) A lista do censo electoral utilizada

d) As certificacións censuais achegadas.

2.- Preparado o expediente electoral, introducirase nun sobre que asinarán o presidente, vogais e interventores, de forma que crucen a parte polo que fora pechado.

3.- Cando teñan preparada a correspondente documentación, o presidente, así como os vogais e interventores que o desexen, farán entrega da mesma inmediatamente á secretaría da Comisión Electoral Central ou, no caso de eleccións de representantes en xuntas de facultade ou escola e en consellos de departamento, e se así o dispón a dita Comisión, á secretaría dos centros e departamentos correspondentes. Previa identificación do presidente e, de ser o caso, dos vogais e interventores, os destinatarios da documentación expedirán o correspondente recibo conforme ao modelo establecido, no que se fará mención da data e hora en que se produce a entrega.

4.- No caso de eleccións de representantes en xuntas de facultade ou escola e en consellos de departamento, os seus respectivos decanatos ou direccións serán responsables de facer chegar á Comisión Electoral Central, se así o solicita, os resultados electorais provisionais

nos formatos que esta estableza, no prazo máximo de 12 horas despois de ter recibido o expediente da Mesa ou Mesas Electorais.

Sección terceira. Proclamación de candidatos electos

Artigo 43. Escrutinio xeral

1.-Recibidos os expedientes electorais das mesas electorais, da mesa electoral electrónica e, se é o caso, dos órganos de goberno dos centros ou departamentos, a Comisión Electoral Central procederá ao escrutinio xeral dos votos emitidos en cada elección. Durante o escrutinio xeral a Comisión non pode anular ningunha acta nin voto. As súas atribucións límitanse a verificar o recuento e a suma dos votos admitidos nas correspondentes mesas segundo as actas ou as copias das actas das mesas, podendo tan só corrixir os meros erros materiais ou de feito, e os aritméticos.

2.- No caso de que nalgunha mesa electoral o número de votos que figure nun acta exceda ao dos electores que haxa na mesa electoral segundo as listas do censo electoral e as certificacións censuais presentadas, coa salvidade do voto emitido polos interventores, a comisión electoral non computará os votos do correspondente sector ou subsector, salvo que existira erro material ou de feito ou aritmético, caso no que procederá a súa reparación.

3.- Concluído o escrutinio, a Comisión Electoral estenderá unha acta de escrutinio do colexio electoral correspondente, que conterá mención expresa do número de electores que haxa nas mesas electorais, segundo as listas do censo electoral e as certificacións censuais presentadas, así como do número de votantes, dos votos obtidos por cada candidato, dos votos en branco e dos votos nulos. Rematada a sesión de escrutinio estenderase tamén unha acta da mesma na que se farán constar tódalas incidencias acontecidas durante o escrutinio. A acta do escrutinio será asinada polo presidente, os vogais e o secretario da comisión electoral.

4.- No escrutinio xeral poderá estar presente un interventor por cada candidato ou agrupación, debidamente acreditado segundo o disposto no artigo 31 deste Regulamento. Os interventores non poderán presentar reclamacións nin protesta ningunha mentres se examinen as actas, agás aquelas observacións puntuais que se refiran á exactitude dos datos lidos. Os interventores presentes asinarán tamén a actas do escrutinio.

Artigo 44. Proclamación provisoria de electos

1.- A Comisión Electoral Central proclamará provisionalmente aos candidatos electos. A acta de proclamación será asinada polo presidente e o secretario da comisión e conterá mención expresa dos votos obtidos por cada candidato, así como a relación nominal dos electos.

2.- No prazo de cinco días dende a publicación do acto de proclamación provisoria de candidatos electos, os candidatos proclamados ou non proclamados poderán interpoñer recurso ante a propia Comisión Electoral Central da Universidade, que os resolverá no prazo de cinco días.

3.- Nas eleccións a reitor, o disposto nos apartados anteriores será tamén de aplicación á segunda volta prevista no artigo 46.3 deste Regulamento.

Artigo 45. Proclamación definitiva de electos

1.- Unha vez resoltos os recursos interpostos contra a proclamación provisoria de candidatos electos, ou transcorrido o prazo previsto para iso sen que se interpuxera ningún, a Comisión Electoral Central procederá á proclamación definitiva de candidatos electos, e estenderá por duplicado a acta correspondente.

2.- A Comisión Electoral Central remitirá unha copia da relación de candidatos electos ao reitor da Universidade ou, cando a elección fora interna dunha facultade, escola ou departamento, ao decano ou director correspondente. O orixinal das actas do escrutinio, da sesión e da proclamación de candidatos electos, así como os recursos interpostos contra esta proclamación e a súa respectiva resolución, quedará arquivado na secretaría da Comisión Electoral Central.

CAPÍTULO SEGUNDO. ELECCIÓN DO REITOR OU REITORA

Artigo 46. Elección do reitor ou reitora

1.- O reitor ou reitora da Universidade será elixido pola comunidade universitaria, mediante elección directa e sufraxio universal ponderado, libre e secreto. Será nomeado polo órgano correspondente da Xunta de Galicia. Os candidatos ou candidatas deberán ser persoal docente e investigador permanente doutor a tempo completo, prestar servizos na USC e estar en posesión, como mínimo, dos requisitos establecidos no apartado 3 da disposición transitoria primeira da Lei Orgánica 2/2023, do Sistema Universitario.

2.- O voto para a elección de reitor ponderarase do xeito disposto no artigo 48 deste regulamento. Será proclamado reitor, en primeira volta, o candidato que acade o apoio proporcional de máis da metade dos votos validamente emitidos, unha vez feitas e aplicadas as ponderacións correspondentes.

3.- Se ningún candidato acada o apoio necesario para ser elixido en primeira volta, procederase a unha segunda elección á que só poderán concorrer os dous candidatos máis apoiados na primeira votación, tendo en conta as ponderacións efectuadas. Nesta segunda volta será proclamado electo o candidato que obteña a maioría simple de votos, atendendo a esas mesmas ponderacións.

4.- No suposto dunha soa candidatura unicamente celebrarase a primeira volta.

5.- No caso de non presentarse candidatos á elección de reitor ou reitora que cumpran os requisitos esixidos, ou non poder ser proclamado electo ningún dos candidatos, continuará en funcións o anterior titular, que deberá convocar de novo as eleccións no prazo de tres meses, tendo en conta o previsto no artigo 23.2 deste Regulamento.

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario.

Artigo modificado: Artigo 46 apartados 1 e 2 nova redacción por artigo único apartado catro.

Artigo 47. Convocatoria da elección

1.- As eleccións a reitor serán convocadas polo reitor coa debida antelación para que teñan lugar antes do termo do seu mandato, e en calquera caso como mínimo un mes antes deste. De non facelo así, convocaraas a Comisión Electoral Central.

2.- De conformidade co artigo 76.2 dos Estatutos da Universidade, o Claustro poderá acordar con carácter extraordinario a convocatoria de eleccións de reitor a iniciativa dun terzo dos seus membros e coa aprobación de dous terzos. Neste caso o reitor cesante continuará en funcións ata a toma de posesión do novo reitor.

3.- A convocatoria de eleccións a reitor deberá indicar, ademais do expresado no artigo 23 deste Regulamento:

a) Data de proclamación provisoria do candidato electo ou, de ser o caso, dos candidatos que concorrerán á segunda volta.

b) Prazo de presentación de recursos contra o acto de proclamación provisoria do candidato electo ou de candidatos para concorrer á segunda volta.

c) Prazo de resolución dos recursos contra o acto de proclamación provisoria do candidato electo ou de candidatos para concorrer á segunda volta.

d) Data de proclamación definitiva do candidato electo ou de candidatos para concorrer á segunda volta.

e) Data da votación en segunda volta, se fose necesaria, que necesariamente será un día lectivo.

f) Data de proclamación provisoria do candidato electo en segunda volta, se fose necesaria.

g) Prazo de presentación de recursos contra o acto de proclamación provisoria do candidato electo en segunda volta, se fose necesaria.



h) Prazo de resolución dos recursos contra o acto de proclamación provisoria do candidato electo en segunda volta, se fose necesaria.

i) Data de proclamación definitiva do candidato electo en segunda volta, se fose necesaria.

Artigo 48. Ponderación do voto

1.- O voto para a elección de reitor ponderarase do seguinte xeito:

a) Sector I, profesorado doutor con vinculación permanente: 51 %

b) Sector II, restantes categorías de persoal docente e investigado: 11 %

c) Sector III, alumnado matriculado en titulacións oficiais: 28 %

d) Sector IV, persoal de administración e servizos: 10%

2.- Para a ponderación do voto nas eleccións a reitor a Comisión Electoral Central procederá do seguinte xeito:

a) Unha vez coñecido o número de votos validamente emitidos a candidaturas no sector de profesorado doutor con vinculación permanente (VPD) calcularase o número total de votos ponderados (VPT), de acordo coa seguinte fórmula: $VPT = VPD \times 100 / 51$.

b) Unha vez coñecido o número total de votos ponderados (VPT), calcularase o número de votos ponderados que corresponde a cada sector en función das porcentaxes atribuídas a cada un deles, tendo en conta que o número de votos ponderados correspondente ao sector de profesorado doutor con vinculación permanente é equivalente ao número de votos validamente emitidos a candidaturas nese sector.

c) Coñecidos os votos ponderados que corresponden a cada un dos sectores calcularase o coeficiente que debe aplicarse aos votos realmente emitidos neles, utilizando catro decimais.

Este coeficiente será a resultante de dividir o número de votos ponderados que corresponden a cada sector entre o número de votos emitidos nel, e nunca poderá ser superior a 1.

d) O número de votos ponderados totais de cada candidatura será o resultado da suma dos votos validamente emitidos ao seu favor polo profesorado doutor con vinculación permanente e dos votos validamente emitidos ao seu favor polos demais sectores multiplicados polo seu respectivo coeficiente de ponderación.

e) En cada sector o número de votos redondearase á unidade mais próxima. Se o primeiro decimal fose inferior a 5 manterase a mesma unidade; e se o primeiro decimal fose superior a 5 redondearase a unha unidade superior.



CAPÍTULO TERCEIRO. ELECCIÓN DE REPRESENTANTES EN ÓRGANOS COLEXIADOS

Sección primeira. Disposicións comúns

Artigo 49. Convocatoria das eleccións

1.- As eleccións a representantes en órganos colexiados serán convocadas pola Comisión Electoral Central coa debida antelación para que teñan lugar antes do termo do mandato dos representantes, e en calquera caso como mínimo un mes antes deste.

2.- A resolución de convocatoria de eleccións indicará, ademais dos datos expresados no artigo 23 deste Regulamento, o número de representantes elixibles en cada sector, subsector ou circunscrición, cando proceda. A dita distribución poderá ser impugnada por quen acredite un interese lexítimo no prazo de tres días ante a Comisión Electoral Central, que resolverá no prazo doutros tres días.

Artigo 50. Candidatos elixibles

1.- A Comisión Electoral Central distribuirá o número de candidatos elixibles en cada un dos sectores ou subsectores previstos neste regulamento entre as circunscricións en función do respectivo número de electores censados nelas. No caso de que o número de representantes que se van elixir por un subsector non sexa suficiente para atribuír, cando menos, un posto a cada circunscrición, a Comisión Electoral Central poderá determinar outras circunscricións.

2.- O sistema electoral será o maioritario simple de voto limitado por listas abertas, podendo votar cada elector a un número que se aproxime o máximo posible ao 70 por cento do número total de elixibles no seu colexio e sector, e, se é o caso, subsector correspondente. No caso de que dous números presenten idéntica proximidade, optarase polo número inferior, tal como se recolle na seguinte táboa:

A B	A B A B	A B
1 1	11 8 21 15	31 22
2 1	12 8 22 15	32 22
3 2	13 9 23 16	33 23
4 3	14 10 24 17	34 24
5 3	15 10 25 17	35 24
6 4	16 11 26 18	36 25
7 5	17 12 27 19	37 26
8 6	18 13 28 20	38 27
9 6	19 13 29 20	39 27
10 7	20 14 30 21	40 28



3.- Serán nomeados candidatos electos os que obtivesen maior número de votos no seu respectivo sector ou subsector e circunscrición ata completar a cota asignada a estes. Non obstante, cando deba garantirse a presenza dos dous campus de Santiago de Compostela e de Lugo ou de todas as grandes áreas científicas, ou algunha outra representación específica, poderán ser designados electos dentro da cota asignada outros candidatos que aseguren a devandita representación, nas condicións que establece o presente regulamento.

4.- No caso de que dous ou máis candidatos obteñan o mesmo número de votos, cando se trate de profesores ou de persoal de administración e servizos proclamarase candidato electo ao que leve máis tempo vinculado á Universidade de Santiago de Compostela como funcionario ou contratado laboral indefinido. Nos restantes casos será elixido o de máis idade.

Sección Segunda. Eleccións de representantes no Claustro Universitario

Artigo 51. Normas xerais

1.- O Claustro Universitario será elixido segundo o disposto nos Estatutos da Universidade e no presente regulamento. No que non se opoñan a estes será tamén de aplicación o seu Regulamento de Réxime interno.

2.- O Claustro Universitario renovarase cada catro anos, preferentemente xunto coas eleccións a reitor. Os representantes do estudantado renovaranse cada dous anos. En todo caso, o Claustro quedará disolto cando aprobe a convocatoria extraordinaria de eleccións a reitor prevista no artigo 47.2 deste Regulamento.

3.- Correspóndelle á Comisión Electoral Central convocar, dirixir e supervisar as eleccións de representantes no Claustro Universitario, así como asignar o número de representantes correspondentes aos subsectores aos que se refire o artigo seguinte.

Artigo 52. Sectores

1.- Elixíranse como membros do Claustro Universitario 300 representantes dos diversos sectores da comunidade universitaria, mediante sufraxio universal, libre, igual, directo e secreto, coa seguinte composición numérica dos sectores que se indican:

- Sector I: cincuenta e un por cento de profesorado doutor con vinculación permanente, é dicir, 153 membros.

- Sector II: once por cento de membros das restantes categorías de persoal docente e investigador, é dicir, 33 membros. O persoal investigador en formación constituirá un subsector ao que lle corresponderá un número de postos proporcional ao seu número de electores.

- Sector III: vinte e oito por cento de alumnado matriculado en titulacións oficiais, é dicir, 84 membros.

- Sector IV: dez por cento de membros do persoal de administración e servizos, é dicir, 30 membros.

2.- Consonte á lexislación vixente o colexio electoral do sector II estará formado polo persoal das seguintes categorías:

- O profesorado funcionario non doutor.

- Profesorado axudante doutor.

- Profesorado colaborador.

- Profesorado asociado.

- Profesorado substituto.

- Profesorado emérito.

- Profesorado visitante.

- Profesorado distinguido.

- O persoal investigador da USC pertencente a algunha das categorías establecidas na Lei 14 /2011, de 1 de xuño, da Ciencia, a Tecnoloxía e a Innovación así como no Acordo sobre clasificación profesional e as condicións retributivas do persoal investigador e do persoal de apoio á investigación da Universidade de Santiago de Compostela, sempre que permitan a colaboración en tarefas docentes.

- O persoal investigador en formación, segundo o establecido nos Estatutos da USC e na disposición adicional quinta deste regulamento. O persoal doutor contratado pola USC consonte a lexislación vixente con cargo a programas competitivos de incorporación ás universidades de investigadores e/ou docentes, sempre que o contrato permita impartir docencia.

- Aqueloutras persoas contratadas pola USC mediante concurso público que realicen labores docentes ou investigadoras e que cumpran os requisitos, entre outros os de permanencia e dedicación que se establezan neste Regulamento.

No caso de profesorado e persoal investigador con vinculación temporal coa USC, será requisito para considerarse elector que o seu vínculo coa Universidade teña unha antigüidade igual ou superior a un ano dentro dos últimos dezaioito meses e unha dedicación polo menos a media xornada.

3.- O colexio electoral do sector III estará integrado polo estudantado da Universidade de Santiago de Compostela matriculado en titulacións oficiais de grao, máster ou doutoramento que cumpra as condicións que estipule o presente Regulamento e que non teñan o dereito a pertencer a outro colexio electoral.

4.- O colexio electoral do sector IV estará integrado polo persoal técnico, de xestión e de administración e servizos con cargo ao capítulo I das normas orzamentarias. Tamén formarán parte deste sector o persoal directivo profesional e o persoal eventual así como o persoal das categorías de persoal investigador sen colaboración en tarefas docentes e das de apoio á investigación recollidas no Acordo sobre clasificación profesional e as condicións retributivas do persoal investigado e do persoal de apoio á investigación da Universidade de Santiago de Compostela.

No caso de persoal técnico, de xestión e de administración e servizos e de persoal investigador sen colaboración en tarefas docentes e persoal de apoio á investigación con vinculación temporal será requisito para consideralo como elector que o seu vínculo coa Universidade teña unha antigüidade igual ou superior a un ano dentro dos últimos dezaoto meses e unha dedicación de polo menos media xornada.

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario.

Artigo modificado: Artigo 52 apartados 2 e 4 nova redacción por artigo único apartado cinco.

Sección Terceira. Eleccións de representantes nas xuntas de centro

Artigo 53. Normas xerais

1.- Correspóndelle á Comisión Electoral Central convocar e supervisar as eleccións de representantes nas xuntas de facultade ou escola, así como asignar o número de representantes de cada sector ou subsector segundo o disposto nos Estatutos da Universidade e no regulamento interno do centro. A Comisión poderá encomendar a xestión de parte do procedemento electoral aos decanatos das facultade e ás direccións das escolas.

2- Todos os representantes elixidos serano por dous anos, salvo os estudantes de todos os ciclos e modalidades, que o serán por un ano.

3.- Unha vez proclamados definitivamente os candidatos electos e producida a comunicación á que se refire o artigo 45.2 deste Regulamento, a secretaría do centro proclamará a composición da xunta de facultade ou escola, que será comunicada aos seus membros e a todo o persoal do centro, así como á Secretaría Xeral da Universidade, que a porá a disposición da Comisión Electoral Central e do Consello de Goberno.



Artigo 54. Sectores e subsectores electorais

1.- As xuntas de facultade ou escola estarán composta por:

a) O persoal docente e investigador e o persoal investigador en formación con docencia no centro e censado nel, así como o non censado que teña neste un encargo docente igual ou superior ao 35% da capacidade docente dun profesor a tempo completo, de xeito que:

- O profesorado con vinculación permanente á Universidade representará o 51%.

- O resto non excederá do 10% do total da Xunta.

b) Unha representación do estudantado de grao e máster do 32%.

c) Unha representación do persoal de administración e servizos censado no centro, nunha proporción do 7% do total da Xunta, cun mínimo de dous membros.

2.- O regulamento de réxime interno de cada centro, de ser o caso, determinará o número de subsectores e a representación de cada un, respectando en todo caso os seguintes límites:

a) O persoal docente e investigador a tempo parcial non poderá representar máis do 5%.

b) O estudantado de grao non poderá representar menos do 20% e garantirase a representación do estudantado de máster.

3.- A duración do mandato dos membros das xuntas de centro elixidos será de dous anos, agás os estudantes, que comprenderá un ano.

Sección Cuarta. Eleccións a representantes nos consellos de departamento

Artigo 55. Normas xerais

1.- Correspóndelle á Comisión Electoral Central convocar e supervisar as eleccións de representantes nos consellos de departamento, así como asignar o número de representantes de cada sector ou subsector segundo o disposto nos Estatutos da Universidade. A Comisión poderá encomendar a xestión de parte do procedemento electoral á dirección dos departamentos.

2.- Todos os representantes elixidos serano por dous anos.

3.- Unha vez proclamados definitivamente os candidatos electos e producida a comunicación á que se refire o artigo 45.2 deste Regulamento, a secretaría do departamento proclamará a composición do Consello do Departamento, que será comunicada aos seus membros e a todo o persoal do departamento, así como á Secretaría Xeral da Universidade, que a porá a disposición da Comisión Electoral Central e do Consello de Goberno.



Artigo 56. Sectores

1.- Consonte o artigo 104 dos Estatutos da Universidade, o Consello de Departamento estará composto por:

- a) Os doutores membros do departamento.
- b) Unha representación do resto do persoal docente e investigador e do persoal investigador en formación, que non excederá do 10% do total de membros.
- c) Unha representación do estudantado do ámbito de docencia do departamento, que suporá o 25% do total dos membros do Consello de Departamento. Desta porcentaxe, o 10% corresponderalle ao estudantado de grao e máster e o 15% ao estudantado de doutoramento.
- d) Un representante do persoal de administración e servizos.

2.- Os profesores asociados de Ciencias da Saúde, doutores ou non, participarán nos consellos de departamento mediante a representación do persoal docente e investigador establecida no parágrafo 1.b) deste artigo.

Sección Quinta. Eleccións a representantes no comité de dirección das escolas de doutoramento

Artigo 57. Normas xerais

1.- Correspóndelle á Comisión Electoral Central supervisar as eleccións de representantes no comité de dirección das escolas de doutoramento. A Comisión poderá encomendar a xestión de parte do procedemento electoral aos órganos unipersonais de dirección segundo o disposto no artigo 11 deste Regulamento.

2.- Todos os representantes elixidos serano por dous anos. A condición de membro do comité de dirección perderase ao cesar a vinculación coa escola, ou ao deixar de cumprir os requisitos demandados no sector polo que foi elixido.

3.- Unha vez proclamados definitivamente os candidatos electos e producida a comunicación á que se refire o artigo 45.2 deste Regulamento, a secretaría da escola proclamará a composición do comité de dirección, da que se lle dará traslado a todos os seus membros, así como á Secretaría Xeral da Universidade, que a porá a disposición da Comisión Electoral Central e do Consello de Goberno.

Artigo 58. Sectores



O comité de dirección da escola de doutoramento estará composto polo seu director, polo secretario, polos coordinadores dos programas de doutoramento adscritos á escola e polos sectores que se detallan:

- a) Unha representación do persoal docente e investigador vinculado aos programas de doutoramento adscritos á escola, nos termos que determine o seu regulamento de réxime interno.
- b) Unha representación dos doutorandos matriculados nos programas de doutoramento adscritos á escola, que suporá o 25% do total dos membros do comité de dirección.
- c) Un representante do persoal de administración e servizos.

Sección sexta. Eleccións de representantes dos directores de departamento, de institutos universitarios de investigación, de escolas de doutoramento e doutras estruturas universitarias de investigación no Consello de Goberno

Artigo 59. Procedemento electoral

- 1.- Os representantes no Consello de Goberno dos directores de departamentos, de institutos universitarios de investigación, das escolas de doutoramento e doutras estruturas universitarias de investigación, consonte o artigo 79. e) dos Estatutos da Universidade, serán elixidos polos membros dos seus respectivos colectivos nunha votación directa e secreta.
- 2.- A elección será convocada polo reitor e presidida polo vicerreitor que designe. Así mesmo, formarán a mesa electoral un secretario e un vogal elixidos por sorteo entre os electores que non sexan candidatos. A votación poderá ser realizada por medios electrónicos.
- 3. Os candidatos electos serán nomeados polo reitor membros do Consello de Goberno.

Artigo 60. Candidatos e electos

- 1.- Na elección dos representantes de directores de departamento, serán nomeados candidatos electos cinco, un por cada unha das cinco grandes áreas de coñecemento. Os directores de departamento poderán votar a un só candidato dentro da súa grande área de coñecemento. En caso de empate, será elixido o candidato máis antigo na súa categoría segundo o artigo 16 dos Estatutos da Universidade.
- 2.- Os directores de instituto universitario de investigación, de escola de doutoramento e doutras estruturas universitarias de investigación elixirán dous representantes no Consello de Goberno. Na elección será nomeado candidato electo o que acadase maior número de votos. En caso de empate entre os votos obtidos polos candidatos, será designado membro o máis antigo na súa categoría consonte o artigo 16 dos Estatutos da Universidade.



3.- Só poderán integrar o censo para as eleccións de representantes dos directores de departamento, de institutos universitarios de investigación, de escolas de doutoramento e doutras estruturas universitarias de investigación no Consello de Goberno, ademais dos directores dos departamentos, institutos universitarios e escolas de doutoramento, as estruturas universitarias de investigación que:

- a) Conten de xeito permanente con dez o máis membros de profesorado, persoal docente ou investigador ou outras categorías similares consonte o disposto no artigo 12 dos Estatutos da Universidade.
- b) Teñan aprobado o seu regulamento de réxime interno no que se prevea a elección democrática do director.

TÍTULO III ELECCIÓN DE DECANOS E DIRECTORES DE CENTRO E DIRECTORES DE DEPARTAMENTO

Artigo 61. Convocatoria

1.- A convocatoria para a elección de decano ou director de centro ou de director de departamento deberá indicar polo menos as seguintes datas e prazos:

- a) Prazo de presentación de candidaturas, que non será inferior a sete días hábiles nin superior a quince.
- b) Proclamación provisional de candidatos.
- c) Prazo de reclamacións contra a proclamación provisional de candidatos, que non será inferior a tres días hábiles.
- d) Proclamación definitiva de candidatos.
- e) Data, lugar e hora da reunión do órgano colexiado no que se efectuará a votación.
- f) Data e lugar da reunión do órgano colexiado na que se procederá á segunda volta da votación, cando sexa necesaria. A segunda volta pode ter lugar na mesma reunión que a primeira, e nunca máis tarde que tres días despois desta.

2.- As eleccións convocaraas o titular do cargo unipersoal, coa debida antelación para que teñan lugar antes do termo do seu mandato, e en calquera caso como mínimo un mes antes deste. No caso de incumprimento do dito deber, as eleccións serán convocadas polo reitor. Se o titular do cargo cesase por causa distinta da expiración do seu mandato, as eleccións serán convocadas por quen o substitúa, nos vinte días seguintes ao dito cesamento.

3.- A reunión do órgano colexiado ao que corresponda a elección na que se procederá á votación non poderá ser convocada para antes de que pasen tres días hábiles despois de



pechado o prazo de presentación de candidaturas nin para despois de corenta e cinco días naturais dende a data de saída da convocatoria.

4.- Sen prexuízo do disposto no artigo 68 deste Regulamento para os directores de departamento, se convocadas as eleccións a órganos unipersoais non se presentara ningún candidato, ou se, concluído o proceso electoral, ningún resultara elixido, o reitor resolverá, con carácter xeral, a continuidade en funcións do anterior titular, que deberá convocar novas eleccións no prazo máximo de tres meses.

Artigo 62. Sesión para a votación

1.- A presidencia da sesión do órgano na que teñan lugar as votacións corresponderá ao seu titular en funcións. No caso de que este presente a súa candidatura a decano ou director de centro ou director de departamento, sería substituído na presidencia do seguinte xeito:

a) No caso de xuntas de facultade ou escola, por un vicedecano ou subdirector.

b) No caso de consellos de departamento, polo profesor presente na sesión máis antigo de acordo co artigo 16 dos Estatutos da Universidade.

2.- No caso de que o secretario presentase a súa candidatura actuará como secretario accidental o membro do órgano de menor idade que reúna as condicións requiridas nos Estatutos da Universidade para o desempeño do cargo.

3.- Antes de cada unha das votacións ás que fai referencia o presente Regulamento os candidatos poderán expoñer o seu programa.

Artigo 63. Votación

A votación realizarase do xeito que determine o presidente do órgano colexiado elector, e en todo caso garantindo o segredo do voto e a seguridade do resultado. Cada elector poderá dar o seu voto a favor dun único candidato, votar en branco ou absterse. O voto poderá expresarse cunha cruz á beira do nome do candidato ou doutro xeito inequívoco.

Artigo 64. Sistema electoral

1.- No caso de concorrencia de máis dun candidato, as eleccións a órganos unipersoais no seo de órganos colexiados celebraranse de acordo co sistema de dobre volta. En primeira volta resultará elixido o candidato que obtivera máis da metade dos votos validamente emitidos polos membros do correspondente órgano colexiado. Se esta non se alcanza, procederase a unha segunda votación, que se poderá celebrar na mesma sesión ou, a máis tardar, no prazo dos tres días seguintes á primeira, entre os dous candidatos máis votados na primeira volta que manteñan a súa candidatura, resultando elixido o que obtivese a maioría simple de votos. No caso de empate na segunda votación, repetirase a mesma, e se se mantivese o empate darase preferencia a quen sexa máis antigo de acordo co artigo 16 dos Estatutos da Universidade.



2.- No caso dun único candidato, só se celebrará unha votación, resultando elixido o candidato se obtén o 25% ou máis dos votos emitidos.

Artigo 65. Moción de censura

1.- O titular dun cargo unipersoal pode perder a súa condición pola adopción, por maioría absoluta, dunha moción de censura. A moción de censura deberá ser proposta polo menos por un terzo dos membros do órgano colexiado que o elixiu e terá que incluír un candidato alternativo.

2.- Se a moción de censura non fose aprobada, os seus asinantes non poderán presentar outra durante o mesmo período de mandato.

Artigo 66. Eleccións de decanos de facultade e directores de escola

1.- Os decanos de facultade e os directores de escola serán elixidos pola súa respectiva xunta de facultade ou escola convocada para tal efecto. O candidato que resulte elixido será nomeado polo reitor. O nomeamento será comunicado ao Consello de Goberno e aos directores dos departamentos que desenvolvan funcións docentes e investigadoras no centro.

2.- Poderán ser candidatos a decano de facultade ou director de escola o profesorado con vinculación permanente censado no centro.

3.- A elección rexerase polo procedemento establecido neste Título III.

Artigo 67. Eleccións de director ou directora do departamento

1.- Os directores ou directoras de departamento serán elixidos polo seu consello de departamento nunha reunión convocada para tal efecto. O candidato que resulte elixido será nomeado polo reitor. O nomeamento comunicarse ao Consello de Goberno e aos decanos e directores das facultades e escolas onde o departamento desenvolva as súas funcións docentes e investigadoras.

2.- Serán candidatos a director de departamento os profesores doutores con vinculación permanente.

3.- A elección rexerase polo procedemento establecido neste Título III.

Artigo 68. Ausencia de candidatos

De non se poder levar a cabo o nomeamento do decano da facultade, do director da escola ou do director do departamento por falta de candidatos que reúnan os requisitos esixidos, o Consello de Goberno, tras a proposta do reitor, encargará provisionalmente as funcións de dirección a un profesor ou profesora do departamento ou, no seu defecto, doutro departamento. Rematado o curso académico, convocaranse eleccións.



TÍTULO IV. PROCEDEMENTO ELECTORAL ELECTRÓNICO

Artigo 69. Sistema de votación

- 1.- A Comisión Electoral decidirá para cada elección o sistema de votación, ordinario ou electrónico.
- 2.- A convocatoria establecerá o sistema de votación e as súas peculiaridades. En particular, a Comisión Electoral Central determinará en cada proceso electoral e segundo as circunstancias se o voto electrónico se emite desde calquera ordenador conectado a Internet ou desde os habilitados para tal fin pola Universidade.
- 3.- A Comisión Electoral Central nomeará, previo sorteo, os membros titulares e suplentes que comporán a Mesa Electoral Electrónica.
- 4.- A Secretaría Xeral tamén poderá poñer a disposición doutros órganos o sistema informático para realizar procedementos electorais electrónicos.

Artigo 70. Mesa Electoral Electrónica

- 1.- A Mesa Electoral Electrónica será única e velará polo correcto desenvolvemento do procedemento electoral dende a apertura da votación ata o final do escrutinio.
- 2.- O presidente da Mesa Electoral Electrónica deberá iniciar o sistema de elección o día e hora sinalada na convocatoria.
- 3.- Os membros da Mesa Electoral Electrónica deberán custodiar as tarxetas e contrasinais por ser imprescindibles para a apertura da urna dixital.

Artigo 71. Procedemento técnico

- 1.- O sistema electoral consistirá na emisión de votos dende un dispositivo conectado a Internet ata unha urna dixital remota situada nun recinto protexido e baixo a custodia da Mesa Electoral Electrónica.
- 2.- Os electores terán que conectarse a través da Secretaría Virtual. En caso de non poder conectarse, porase en coñecemento da Mesa Electoral Electrónica ou da Secretaría Xeral para os efectos de que se tomen as oportunas medidas para resolver a incidencia.
- 3.- Os electores teranse que identificar mediante as claves de acceso corporativas da Universidade e/ou o certificado dixital, segundo se fixe na convocatoria ou o determine a Mesa Electoral antes do inicio das votacións .

Artigo 72. Votación



A votación realizarase unha soa vez e o voto será directo. O sistema de votación contemplará os sistemas de votos a persoas e votos en branco. Non existirán votos nulos.

Disposición adicional primeira. Competencia no reitor

Nos procesos electorais regulados neste Regulamento cuxa convocatoria non estea expresamente atribuída a un órgano unipersoal, a competencia para convocar residirá no reitor previa proposta da Comisión Electoral Central.

Disposición adicional segunda. Órganos de goberno en centros de nova creación

1.- En centros de nova creación, previa á constitución da xunta de facultade ou escola, o reitor, coa finalidade de coordinar a creación e posta en marcha do centro, nomeará un decano ou director comisario que asuma as funcións que os Estatutos da Universidade outorgan aos decanos e directores de centros. A duración do mandato do dito decano ou director rematará co nomeamento polo reitor do decano ou director elixido pola xunta da facultade ou escola.

2.- A constitución da xunta de facultade ou escola deberá facerse unha vez celebradas as eleccións de representantes nela, que deberá convocar a Comisión Electoral Central, sempre que sexa posible, xunto coas correspondentes aos restantes centros da Universidade, segundo o disposto neste Regulamento.

Disposición adicional terceira. Reagrupación de centros ou departamentos

Os acordos e disposicións sobre reagrupación de centros ou departamentos preverán a adscrición dos representantes electos nos órganos colexiados aos novos órganos que se creen. A Comisión Electoral Central será competente para resolver os conflitos que poidan producirse.

Disposición adicional cuarta. Estruturas universitarias de investigación

1.- Para os efectos dos artigos 79.e) dos Estatutos da Universidade e 59 e seguintes deste Regulamento e para a constitución do censo electoral, son estruturas universitarias de investigación os centros singulares, os centros propios, os centros mixtos con sede oficial na Universidade de Santiago de Compostela dedicados á actividade investigadora.

2.- Son centros mixtos os que:

a) Sexan promovidos ou participados por outra universidade, administración ou entidade, pública ou privada, na súa titularidade ou no seu financiamento.

b) Teñan a súa sede oficial na Universidade de Santiago de Compostela.



c) O seu director pertencerá ao profesorado doutor con vinculación permanente.

3.- Quedan excluídos do concepto de estruturas universitarias de investigación calquera outro centro, escola, estación ou calquera unidade que desenvolva de xeito principal unha actividade docente.

Disposición adicional quinta. Investigadores en formación

Consonte o disposto no artigo 31 dos Estatutos da Universidade e para os efectos deste Regulamento, considéranse investigadores en formación aquelas persoas con titulación universitaria que estando a realizar a tese de doutoramento, sexan beneficiarias de programas de axuda dirixidos ao desenvolvemento de actividades de formación e especialización científica, técnica, artística ou humanística, de acordo co establecido na normativa deste tipo de persoal, e cuxa bolsa ou contrato estea vinculado á Universidade de Santiago de Compostela.

Disposición adicional sexta. Escolas de doutoramento

Para os efectos do artigo 13 deste Regulamento, ten a consideración de centro cada unha das escolas de doutoramento.

Disposición adicional sétima. Linguaxe non sexista

As expresións referidas aos cargos académicos e a certas responsabilidades, así como as de alumnos, estudantes e similares, entenderase nun seu sentido neutro, sen identificación de sexo, pois abranguen tanto ao xénero feminino como ao masculino.

Disposición adicional oitava. Referencias ao persoal de administración e servizos

Todas as referencias contidas neste regulamento ao persoal de administración e servizos deberán entenderse feitas ao persoal técnico, de xestión e de administración e servizos.

Acordo do Consello de Goberno do 26 de setembro de 2025, polo que se adapta o Regulamento Electoral Xeral da USC á Lei Orgánica 2/2023, do 22 de marzo, do Sistema Universitario.

Artigo engadido: Disposición adicional oitava engadida por artigo único apartado seis.

Disposición transitoria

Os órganos colexiados de goberno que vexan alterada a súa composición como consecuencia da aprobación do presente Regulamento adaptarán a súa composición na primeira renovación que se produza.

Disposición derogatoria



Quedan derogadas as normas de igual ou inferior rango que se opoñan ao contido do presente Regulamento e, expresamente, o Regulamento Electoral Xeral aprobado polo Consello de Goberno do 30 de marzo de 2004, e o acordo do Consello de Goberno do 21 de febreiro de 2014, de modificación do Regulamento Electoral Xeral da Universidade de Santiago de Compostela.

Disposición final

O presente regulamento entrará en vigor ao día seguinte da súa publicación no Taboleiro Electrónico de Anuncios da Universidade logo da aprobación polo Consello de Goberno.

